

名宦

親民之官惟在守令蓋以周知疾苦能朝夕拊循也
青浦壤瘠民偷鼠牙雀角之訟日以數十計而蠹胥
把持盤互其間號稱難治且賦稅繁多弊竇百出稍
不慎往往倍溢于正供之外宦斯士者懲奸胥董漕
弊禁訟師然後良法美意可行也二百餘年來循良
不少紀載缺如多不可考今就舊志及史傳竝散見
于詩文集流傳于黎獻者取以著于篇俾後之涖政
者勸焉

宋

章竦字質夫建州浦城人始以世父得象蔭爲將作監主
簿復舉進士甲科知陳留縣以最擢提舉荆湖北路刑獄
稍遷直龍圖閣知慶州方是時朝廷戒邊吏毋得外侵乃
更斥葭蘆安疆等四砦予夏人使歸我永樂之人竦以謂
古者諸侯有罪貶爵削地甚則六師移之今旣憚用兵宜
稍取其土疆如古削地之制彼雖猖獗壤地褊小兵不一
再舉卽勢蹙力窘矣夏人將寇環慶竦命驍將將精兵授
以方畧又使人置毒于牛圈瀦水中旣而虜入圍環州其
所遣將折可適潛師洪德城虜過識其母梁氏旗幟鼓譟

而出斬千餘級虜經牛圈飲其水人馬多死明年除同知
紹聖初徙南京改集賢殿修撰知廣州又知渭州至卽上
言城瓠蘆河川據形勝以窺夏國乃以三月及熙河秦鳳
慶四路之師出瓠蘆河川築二城于石門峽江口好水河
之陰二旬有二日而畢賜名平夏城靈平砦方輿役虜以
其衆乘我師大敗之擢樞密直學士旣而環慶鄜延河東
熙河皆築城夏人聘視不敢動實自涇原始無何夏國主
與其母自將數十萬圍平夏不能克一夕遁去戎母慙勞
面而還除龍圖閣學士夏國統軍嵬名阿埋西壽監軍妹
勒都逋皆勇悍善戰竄遣折可適郭成間以輕騎夜直入

其帳執之盡俘其家虜馘三千餘獲牛羊十萬種羌震駭
進端明殿學士竄在涇原四年凡置州一城砦九夏人自
平夏之敗不復能軍屢請命乞朝貢天子赦而聽之乃爲
寢兵徽宗卽位徙知河南入見留提舉中太一宮遂拜同
知樞密院事以老授資政殿學士中太一宮使未幾卒諡
曰莊簡

按莊簡監華亭鹽不見於宋史及東都事畧且其墓
在杭之寶石山卒後徽宗命其壻劉何使兩浙以供
葬事未聞居青邑也然元澤爲公五世孫支派可據
而雲間志已載章竄宅在青龍鎮是非出於附會者

殆以監鹽無關政績故正史缺如歟

趙彥啟字彥和嘉定中監青龍鎮稅重建鎮學養士百里之間絃歌相聞兵部侍郎杜孝嚴以彥啟有官不顯有民不多而所知者本所務者大特爲文以美之

元

瞿智字惠夫婁江人爲青龍鎮學教諭築通波閣居之傳學善詩以書法鈎勒蘭尤妙絕累遷文學官攝紹興錄判

明

石繼芳字克肖一字岱宇山東益都人由舉人官猗氏教諭擢桐城縣知縣萬歷初調青浦時縣廢而復設繼芳周

青浦縣志

卷二十四

三

名宦

咨相度以唐行鎮道里適均水陸交會乃定計築城濬池學校壇壝皆悉心區畫尤加意於人才擇秀民而親教之居三載陞錦衣衛經歷累官陝西兵備道按察司副使因疇拜反遇害於寧夏

屠隆字長卿浙江鄞縣人生有異才落筆數千言立就舉萬歷五年進士由潁上知縣調任青浦邑新建諸務未舉而地又卑庠下值大水民以爲病隆徒行泥淖中督吏民以治堤害減賦額招流亡水不爲害時張居正柄國行清丈法餘出者增賦隆以丈出餘田仍繫原田下知府閩邦寧詰之隆曰丈出餘田譬之衣帶帶非衣不附邦寧語塞

嘗上徐階書云青浦土瘠賦重流移相望其病亟矣先是衙役竊弄政出多門而故令又寄耳目於匪人以致敗事今嚴戢各役奉三尺惟謹門以內從嚴門以外從寬聽斷惟情惟理絕不敢咨訪近習以滋他弊然左右謹嚴耳目盡廢形影塊然門外萬里卽地方利弊閭閻隱痛皆莫能知欲密訪於左右恐未得是非之實而適足以啟奸萌試問於衆人則或避恩怨之嫌而莫肯以實對此其難者一也先是催科太嚴捶楚過濫總管經催人等至枵腹而完官裹創而催辦民甚稱苦逃亡接踵今寬之下頗感激黽勉完納似矣然朝廷歲額必不可緩徒以官受累無補於

民夫與其姑寬而隨誤以貽後日然眉之患不如先嚴而責完以與百姓息肩之期且錢糧不完或係貧民拖欠或係奸豪負賴或係經收侵欺一概從寬寬貧民猶不失拊循寬侵負則幾蔑國法此其難者二也本縣因田地瘠薄歲苦重差以致人戶逃絕因人戶逃絕以致田地愈荒召募開墾之令非不曰懸但緣鄉野小民領種告帖者到縣不時給發有守候之苦有科索之費則恐領種荒田未見其利而先受其害是以小民疑畏不來今訪知弊端業爲立法小民始樂于開墾一月之內領帖者已不下三百餘家但貧民開墾荒田必資工本有田而無工本將焉用之

卽給帖猶勿給矣將議賑卹則官帑旣不可擅動申請又未必見從此其難者三也今爲計不得已捐不肖俸資及無礙官銀立法給散貧民爲開墾工本小惠未徧則出示勸諭富民大家自相賑助以富濟貧不拘多寡而本縣爲之懸立賞格或免其罪責或免其雜差重則或獎以牌扁或榮以衣冠以相風勸似矣然自古恤民之政未聞有此恐非政體其可行與否伏願門下教之荒田人戶逃絕重額尚存往往遺累里排賠納不肖業已親歷四鄉踏勘荒田頗爲得實若不設法調停地方日就彫落已經申請議處議者謂求減額糧又謂求作改折愚意義改折則恐小

利無補于民議減額則恐定額難以定減此一節敢望門下將青浦凋瘵苦情與撫臺一言之卽片言九鼎爲地方造福不小矣又與馮夢禎書云青浦地一隅四方無賴宅其中爲小村落華上二縣復割荒區瘠土稍附益之以置縣城中廬舍寥落大都華上兩縣貴官大家別業民貧甚矣而令出賦稅至十數萬民貧故俗趨於姦利苦賦斂急故俗又益日趨於貧又賦斂多爲貴官大家所逋催租吏慆詐者挾官錢從博人酒家飲而募無賴受縣官鞭箠貧者體無完膚易麻桌絲粟不得錢有鬻妻孥者否則挈家逃耳欲以賴上之治治青浦勢不可將釋拊循而議操切

又苦天性雅不能也十數萬官錢令荒落瘠土出辦誰能
堪此者非刀錐腴削不得有卽刀錐腴削膏血幾何今強
其天性而用筭楚良苦稍寬則十數萬官錢必不辦監司
者將持三尺而問罪青浦令寧復爲令乎蓋言其難如此
至於政事之餘作祠以祀陸機陸雲招名士馮夢禎及沈
明臣輩飲酒賦詩游九峯三泖以仙令自許士民愛戴之
尋遷禮部主事爲仇人俞顯卿誣陷罷歸道經青浦父老
爲歛田千畝請徙居隆不許歡飲三日謝去哀所作詩文
爲由拳集

易之貞字楚衡湖廣蘄水人 舉人萬歷七年授青浦

青浦縣志

卷二十四

六

名宦

教諭時學舍初立弟子員皆析自他學頗渙而無紀之貞
整設科條躬親督課士皆凜然

羅朝國字維貞江西新建人萬歷十一年進士來爲知縣
治尚寬平尤能禁奸止暴隸卒向以承符勾攝爲橫朝國
有所攝對卽屬之投牒者絀隸不用邑固澤國而瘠水數
爲災漕使者索賦甚急卒爲緩之更設粥以食饑者以是
歲儉而不饑邑多逋賦民率逃徙朝國白之兩臺請捐積
逋更令得以銀代粟以治最行取吏部主事後歷官至南
京刑部尚書乞歸里門雍容論學無疾而逝贈少保

李松字 江西永新人以鴻臚寺序班出爲縣丞時知

縣羅朝國以廉達稱平歲方大稔斗米至二百錢松運粟以食其役人曰我不忍以餓隸擾瘠民也繼遷交州州判以去

卓鈿字邦華號榮麓福建沙縣人萬歷十年舉人授青浦知縣尚廉潔懲奸猾而留心於造士朔望輒引見諸生爲講經義士爭砥礪邑未有志鈿屬王圻創輯成書人尤稱之旋以積勞歿於官囊無餘錢監司賻贈之始得歸其喪其後有湖州沈雲楫者來爲縣以貪穢聞士民追思鈿將立碑以懷之而邑有與沈昵者欲令兩人共記一碑衆議勿善也聞諸知府府以詢于衆有孝廉起而對曰如有所

立卓爾沈同以其私知府憮然乃令獨立卓碑

毛文煒字玉臺吳縣人中

應天鄉試尋選邑教

諭絕筐篚謝修脯月俸不給貸佐之諸生有爲奸所誣者廉得其狀白之又有以徭役愆期者法宜坐力請得解卒全其家任五年擢廣東博羅縣知縣

王思任字季重號遂東浙江山陰人萬歷二十三年進士觀政刑部授邑知縣思任于催科編審聽訟諸事皆犁然秩然吏不得緣以爲奸暇則以詩文自娛名流雲集尤留心人才請廣科舉及入學之額督學道因其言建議以上邑中文聲之振皆其力也逾年以事去尋起爲江西九江

僉事道未赴江寧破馬士英遁至紹興思任上疏數其罪請斬首傳示各省又以書與士英痛斥之魯王監國累擢思任至禮部尚書師潰走入山中以死

鮑奇模字赤城浙江餘杭人萬歷二十三年進士選邑知縣盡心民事時縣中徭役每有放富差貧之患奇模先于編審時按產爲甲乙徭役視以爲差不令里胥得上下其手催科輒寬其期不敲扑而賦自集日食以一鮭菜自給未嘗以供具爲列肆累也凡胥隸之積蠹博徒之聚賭惡少之私鬪嚴其禁約法在必行而於橋梁之便民學宮之造士則皆捐廉俸以倡之

青浦縣志

卷二十四

八

名宦

張應登字顯卿丹陽人以歲貢授青浦訓導動止端方不妄言笑或投暮夜金乞一函於縣令立謝之課士有方多所成就

劉永清字 沛縣人萬歷三十四年選邑訓導進諸生講經課藝寒暑忘疲踰年意有不屑欲棄官去知縣韓原善勉留之永清潛艤舟郊外日旣暝稅衣冠掛郭西門上賦詩見志登舟而去時稱其高尚云

韓原善字繼之號鵬南直隸盧龍人萬歷三十五年進士三十六年蒞青浦持躬莊愼盛暑退食必衣冠邑以水爲患是歲潦益劇原善齋宿露禱徒步風雨泥淖中旋請賑

請蠲請平糶請設糜粥且曰救荒如治兵非特用威難用恩亦難也其散粟也親入鄉令民坐田塍間隨舟散給之民入城令列坐城上隨人唱給之設粥入局躬親爨汲嘗旨否撤局之日復散錢以助耕者饑民皆蒙實惠又除博徒及訟師擒無賴惡少年立斃之曰除盜之本在是也漕卒橫者請於上官械常平倉前漕減耗過半調長洲縣再擢戶部主事終開元兵備道

賀仲軾字景瞻河南獲嘉人萬歷三十八年進士令青浦日早起視事左右却立屏息無一人敢近者督賦不煩編審有法民皆誦之未幾擢刑部主事

青浦縣志

卷二十四

九

名宦

徐尚勲號未孩浙江德清人天啟二年進士任青浦適當天啟四年大火尚勲力請改折邑人賴之五年調華亭擢監察御史

鄭友元字其山湖廣京山人天啟元年進士任青浦發奸摘伏剽決如流老吏皆憚之催輸有法三年邑大治崇禎庚午分校陳子龍出其門調華亭旋入爲御史以逋青浦金花銀一千七百與給事中周瑞豹熊開元並貶二秩不就寄居小蒸久之乃歸楚不仕以終

本朝

唐瑾字雪靈河南光州人順治三年進士初任嘉定縣知

縣拊循百姓課土不少輟請減本色折漕銀二萬餘丁艱起補青浦亦以惠政傳

魏球字鳴玉號仁齋福建建安人順治五年舉人初任廣東遷江縣知縣有惠政康熙六年補青浦廉以律身慈以惠下謙以接士大夫居年餘建文昌書院進諸生而講論之兵燹之後卓鈿縣志散佚不全聘邑人諸嗣郢等修之尋以催科不力罷官既出署民築青山棠院以居焉

周肇字子俶號東岡幼穎異十歲能爲文太倉張溥舉復社聲氣傾海內肇以總角稱高弟名籍甚時王撰王昊等稱婁東十子肇爲之冠貢入太學順治十五年中順天鄉

青浦縣志

卷二十四

十

名宦

試久之得青浦教諭振興學校舉卓異擢江西新淦縣知縣亡何病卒年六十九

李鴻字青立河南南陽人明大學士賢裔孫父孝源翰林院侍講學士雲南布政使彭而述其妻父也鴻以名家子能詩先官中書舍人左遷青浦丞治事餘輒與王原孫鉉輩置酒賦詩未幾病卒時賢惋惜之著有紅香閣集
施鴻字則威福建侯官人爲縣丞著史測若干卷嘗以部運至京師謁尚書王士正論南北朝事靡靡可聽士正雅器之

張庚字漢西廣東惠來人康熙十一年舉人選青浦知縣

修學宮復尊經閣士爭向學邑多奸吏工挾制督惑之術
庚繩以峻法使不得逞因事問民疾苦無隱不達民以安
堵年餘以事罷去郡丞某來署其任庚出民罷市巷哭填
塞城闈掖庚歸庚不得已令家人間道奉印緹城下予郡
丞民復築惠來書院以居之邑之士人載酒而論文者村
童野叟繼粟饋菜把於門者率以爲常居二年以病卒子
貞元幼妾徐氏撫之凡二十年而歿以節稱先是庚之去
官也崑山徐元文方爲大學士會歲除置酒合樂召賓客
客有述庚去官時事者元文歎曰鄰邑有賢令而不能知
至於廢斥某之過也爲之罷酒

劉廷諫字 漢軍正黃旗人康熙十五年來莅縣事時
值兵興又當旱潦之後廷諫一以撫字爲先資性敏達遇
事立解額賦不缺而百姓無追呼之擾有訟者片言折之
不假箠楚尤慮民俗奢僭示以廉儉衣布食蔬自奉刻苦
時時延見士民民間疾苦無不悉者未幾當遷上官知民
不忍釋留之令清田畝民喜其復來建清田公署以居之
許昭來字 雲南石屏州人康熙二十九年舉人下車
後振文教懲奸宄知邑民彫敝務爲噢咻之莅政三月有
上司至縣索數十鎰意猶未厭昭來惋憤引疾去邑人以
爲高因圖其像於學宮又畫九峯三泖城西水驛之景及

父老子弟流連攀戀之情作詩系之爲浦上題襟集

洪亮采字揆菴貴州定遠人康熙三十五年舉人出湯石曾之門授青浦知縣謹身節用悃悃無華生平以四事自勵一勤民一厲操一恤災一崇學嘗與士子相見輒索其文曰我存諸篋衍他日歸讀汝文如見汝面且吾省文字遜江南遠甚攜以歸俾有所矜式也其好尚如此官四載以丁憂歸亮采知堪輿家言以南門水關寬大改而隘之後登瀛橋市販日集人謂其驗云

王溯維號七峯河南嵩縣人康熙三十九年進士授青浦知縣明於聽斷案無留牘每坐堂皇決事鬚髯戟張聲如

青浦縣志

卷二十四

十一

名宦

洪鐘暗鳴叱咤訟者以及胥役人人震恐及察其駁詰問難悉中條理摘奸發伏無敢遁其情也惡猾吏尤甚稍不當輒刑之然卒無枉者故人畏其嚴而樂其廉明在任三年以絀誤罷官未幾復起爲崑山縣知縣雍正二年兼署青浦縣事囚有錢某者呼冤訊之蓋前任吳宏助分狡人闡縣丞侯三錫受犯人賄縱之而使錢代承其罪溯維拘正犯并究胥吏之同得贓者劾縣丞罷之三錫哀求丐命不能得也後陞太倉州知州歷官至浙江嘉湖分巡道雍正七年奉

旨查江蘇積欠歷年旣久數目繁苐胥役穿穴輾轉其中

莫可究詰溯維悉心考核分別官侵役蝕民欠三項凡胥役之欺隱者加以重刑盡發其弊他人莫能及也

王理字勵園奉天

旗人雍正四年舉人抵任時年逾

六十矣秉性剛直精力矍鑠望之體貌偉如也敦儉素絕華美訟至者隨理之不以煩瑣爲嫌易怒人見而畏之然案無留牘人無拖累每事皆手裁使令皆擇其樸實者不過三四人以一子自隨親友悉謝去之却鹽典餽送舊規清漕銀多徵積弊在任五載告休謝事去

易祖拭字漱南號嘯谿湖南湘潭人署青浦主簿性爽朗儀表偉然能詩尤工於畫自山水及蟲魚花卉不屑以工

青浦縣志

卷二十四

十三

名宦

巧見長信手抒寫無不精詣蓋天才敏捷旣困于下吏無以見其長故抑塞磊落之氣一於畫發之長縑巨幅無不揮灑立就厭其意而去當其解衣槃礴興酣落墨旁若無人掀鬚自以爲得也木幾丁憂歸久之病卒

戴仁行字躍淵山東濟寧州人雍正九年進士由荆谿令調知福泉縣性和而介事無巨細必躬自裁決不假手幕僚胥吏先是雍正三年議析青浦縣分置福泉所轄田多瘠薄而三十一保地隣上海嘉定民俗刁悍抗糧習爲固然仁行廉知其弊一切征輸按圖額之多寡均爲十限先發圖簿令地保勸催隨其物力之便完及限額而止以故

民無差擾而輸納通融羣皆踴躍遂無逋賦乾隆六七兩年以十分全完奏銷蓋通省未有之事也十年秩滿督撫特薦將內擢矣會以并縣謝事旋因盜案未獲挂吏議遂歸不復仕

褚啟宗字亮儕號望亭安徽合肥人乾隆二十五年進士授青浦知縣維時吳淞江久淤不治水漲田往往淹沒乾隆二十八年巡撫莊有恭屬候補知府李原侯知縣張世友縣丞楊宜崙會勘議濬之核定應用銀數通縣按畝攤派所派未能驟集乃奏請先借帑項於兩稅內分年繳納得

旨派上海青浦嘉定三縣各任其地青浦應濬者共里啟宗按稅九兩出夫一名給直赴工又度江勢迂曲則水流而不暢易以停沙從白鱔灣起抵許家村凡四里疏爲新河以取直勢正月啟工迄三月未竣事新河所開之田計畝給直并請豁免漕米又建千秋橋以便來往迄今水不爲患縣城創建日久殘缺已甚三十二年奉旨興修布政使屬啟宗核計又令崑山縣知縣李景龍助理自南門而東至北門水關景龍督之南門而西至北門啟宗督之塼埴悉用新者城隍之側用木排護以防其頽工作堅密民誦其政旋以丁艱歸服闋病卒